

7  
DISSERTATIO QUINTA  
DE  
HUMANÆ  
MACHINÆ  
VITIIS

AD  
IMUM VENTREM RELATIS,  
AC EJUS MAXIME VISCERA  
AFFLIGENTIBUS.

---

Quam  
*Divina favente Clementia,*  
*Amplissimæ Facultatis Medicæ jussu,*  
*PRÆSIDE*  
ELIA CAMERARIO,  
PROF. ORD. MED. ET CONS.  
WIRT.

PRO LICENTIA

omnisque in Medica Arte Honoribus consequendis,  
*publicè defendet*  
JOH. FRIDERIGUS MEGENHARD, *Uracens.*  
*Ad diem* *Aug. A. MDCCXXVII.*

---

TUBINGÆ, literis JOSEPHI SIGMUNDI.



7

THE UNIVERSITY OF CHICAGO

EMANUEL

LEONARD

LEONARD

LEONARD

LEONARD

LEONARD

LEONARD

LEONARD

LEONARD

LEONARD

LEONARD





# PRÆFATIO.



Uti pluribus jam abhinc annis Academiæ huic Celeberrimæ valedixeram, in eam nunc postliminiò redii, ut Medico Studiorum Cursui optatam imponerem coronidem; Selegi eum in finem congruum scopo meo Thema Disputationis Inauguralis, utile in praxi, ac scitu necessarium quam maximè. Deus favere cœptis hisce nostris clementissimè dignetur!

*Q. D. B. V.*

**A**ffectu Hypochondriaco nihil magis est complicatum, intricatumque, in illo enim incredibili varietate symptomata omnis generis conjunguntur, nunc plura nunc pauciora, ita tamen, ut vix nominare aliquod liceat, quod accedere ad quoddam illius schema non possit; uti verò symptomata incredibili diversitate inter se colligata deprehenduntur, ita graduum ea quoque multiplicitas est varietasque, ut classes ejus speciesque infimæ tot ferè enascantur, conspicianturque quot hypochondriacorum sese offerunt individua. Uti enim sexui



utriusque commune est malum, illudque etiam foeminae, bis quasi ob con- nexa arctius uteri vitia, patiuntur, ita & nulli hominum generi aut condi- tioni parcat, ipso mutabilior proteo, cum sub infinitis schematum va- rietatibus eorum quoque in sinu ac hypochondriis, imò intima sangui- nis diathesi latitat, quos sanissimos alii nullaque infectos labe morbo- rum judicarent. Licet autem Eruditorum maximè habeatur morbus, qui se- dentaria vita, lucubrationibus, nimia Spirituum assidua meditationum- seriarum frequentia absumptione, ac depressione, vigiliisque eosdem nimis dissipantibus atque agitantibus, illius in se radices firmare solent; alio- tamen aequè solet torquere atque occupare, cum & oriatur ab aliis rerum non naturalium excessibus ac abusibus; quid enim frequentius est, quam videre affectum hunc proteiformem enatum in iis, qui vel voracita- te nimia, vel vini ingurgitatione immodica, aut aliis ingestorum pravis qualitatibus eum sibi accersunt, aut frequentius etiam in iis, qui mœ- rore, tristitia, timoribus, frequenti iracundia, metuque anxio frequen- tius fatigant suos spiritus animales.

Ista verò molestiarum ac Symptomatum farrago *hypochondriis* adscribitur, quoniam in hypochondriis continentur illae partes ac viscera, quibus origo mali potissimum tribui solet; quae scilicet, prout sangui- neam massam variè filtrant, percolant, à serosa, ac biliosa portione abun- dantiore liberant, sicque sanguinis vigorem conservant, variè illum prae- parando, ac perficiendo, idque vel plenius, vel segnius, imò perversè a- gunt, eo ipso cudere solent cumulata illa Symptomata, cum scilicet eo- rum tonus rectè se non habet, chylusque & sanguis non, ut par est, perfici- tur, sed potius cruditates hic cumulantur, obstructions gignuntur, visciditas humorum praevalet, indeque flatulentia enascitur, origo innu- merarum molestiarum; sic facilè prædominatur, chylò degenerante & a- cescente, viscidum acidumque in primis viis, bile, quae alias spicula ejus obviscare, obtundere, mitigare, imò infringere debet, jam inertiore, mi- nus activa, viscidior aut parcior; vel ex adverso bilis exaltata nimis, acrimoniam concipit nimiam ac fervorem inducit humoribus, sanguine organico ebulliente, lienem distendente ac quasi obruente, in varias a- taxias atque aggestiones intempestivas ruente, qui etiam status flatibus suis stipatus est, aliamque & sibi convenientem exhibet scenam amplissi- mi hujus affectus; prout igitur nunc sal fixius enixum praevalet sulphu- reo principio, ac volatiliori sali, aut acidum quoque huic praevalet, jun- gitur humoribus viscidis ac pituitosis, bilemque variè obtundit, varias-

que



que alias subeunt hæc principia heterogenea combinationes, status quoque variis Symptomatibus valde distinctus, in generalibus tamen affectus hypochondriaci molestiis conveniens, exoritur, magis vel minus diuturnus, radicans, ac molestus, gradibus innumeris varians, refractarius plerumque, proteiformis, nervosum cumprimis Systema in consensum trahens, cujus consensus & communes ligatique inter se plexus tam diversis per omnem corporis ambitum malis molestiisque simultaneis ansam præbent, in ipsos quandoque spasmos, fortiores nunc, nunc verò mitiores erumpentes.

Non possibile est plenam affectus hujus descriptionem exhibere, ob innumeras istas variationes, aliqua tamen recensenda sunt; digestionis vitia, chyli cruditas, læsaque chylicatio potissimum ac primo loco ponenda sunt, hinc & jejuni & à pastu ciboque sumto aliis affliguntur malis, vel iisdem exacerbatis variè ægri, quorum quandoque appetitus nimium augetur, aliquandò naturalis manet, aliàs verò magis minusve prosternitur atque imminuitur; chylo interim rarò ad perfectiorem coctionem deducto, & sub ipsa chyli præparatione molestiis quoque se exercentibus; nunc ventriculi ardore, nunc cardialgia exurgente, ventriculi gravatio, pressionisque sensus, aut ponderis, inflatio quoque ejus, ructus inde propulsi, vel cum vehementia, vel languidius quoque inde elucentes, ac quasi exhalantes, imò vel manibus, ac variis corporis motionibus expressi, nunc acidi, nunc nidorosi, imò & insipidi, & variatione ingrati, ac nauseabundi; prout vel calida prædominatur causa, vel frigida, (hæc enim & præcipua est affectus *hypochondriaci* distinctio per omnem praxin constanter attendenda) hinc phlogoses & à pastu & in intervallis, vagi æstus, quandoque & horripilationes, anxietates tum animi, tum corporis vitio magis excitati, à flatibus nunc, nunc à tensionibus spasmodicis pendentes; flatibus obortis, ac rugitibus murmuribusque se manifestantibus, ac torquentibus molestè ægros, etiam cum pariori cibo fuerint usi. Accedunt quandoque vomitus tum ventriculo à contentis irritato, gravatoque, tum à consensu, spasmò aliunde traducto, tum flatibus irritantibus, tum nausea oborta, tum & affectibus animi variis; ejiciuntur verò & cibi, & cruditates, biliosæ, pituitosæ, ferosæ, acres, varii coloris, saporis, consistentiæ ac fœtoris. Tarditatem alvi potissimum accusant hypochondriaci, & molestissimas fecum exclusiones, imò extorsiones, expressionesque; sunt ex adverso quos fluxilior vexat alvus, in quibusdam à levissima occasione datâ in cibo, potu, au-



ra frigida, corporis denudatione statim rediens, in aliis rarior; ita ut & sint, qui & adstrictione pertinaci, & intempestiva laxitate alvi torqueantur æqualiter distinctis temporibus, nullamque servante mediocritatem, quin ipso hoc tempore aliquem observavi, qui duriora cum labore scybala manè quovis egerit, per diem diarrhœa aliquoties succedente, altero autem durioribus scybalis redeuntibus, & sic porro diutius continuante paradoxa egestione; Urinâ hypochondriacorum nihil mutabilius, nihil magis varium; nunc copiosa profunditur, nunc parca, imò parcissima, hæcque eadem sibi die possunt succedere, potissimum à pastu largior, & limpida sæpe instar fontanæ cernitur; aliquando & naturalis, aliàs tinctior, nunc cum, nunc sine sedimento, nunc clara, nunc turbida, arenulis ferè ordinariè scatens rubicundis, cinnabarinis, passim innatantibus, ac se vitri quoque lateri affigentibus.

Dolores omnis generis patiuntur hypochondriaci, et si plures essent possibiles, de pluribus aliis ac novis quererentur; ita tamen ut quidam etiam excipiantur, ad minimum intervalla sua habeant, in nonnullis satis diuturna, quibus de dolore nullo conqueruntur, aliis perpetuæ insistentibus querelæ; nunc ipsum dolet hypochondrium, à flatibus, sanguinisque aggestionibus ortis variis tensionibus, in liene, in colo, in mesenterii ac mesocoli plexibus, aliisque locis vicinis, nunc in dextro, nunc in sinistro latere exferente se dolore, & migrante subinde ab uno in aliud, vel utrumque simul occupante ac stringente, nunc tensivo, nunc gravativo, nunc punctorio, imò & pulsante quasi dolore, ac subinde ardore; juncto nonnunquam tumore, inflatione, nunc pertinaciore, nunc vago, citoque evanescente, ac sæpe redeunte, cum æstu & tensionibus variis, variè se extendentibus, & cum aliis partibus communicantibus; nec abdominis inflationes crebræ, tensiones flatulentæ, tormina varia defunt, nunc umbilici magis regionem infestantia, nunc & extensa sursum ad ventriculi regionem, ac deorsum ad hypogastrii pubisque partes, tractis in consortium lateribus, imò dorso, sacro osse, lumbis, & coxa, sterno etiam quandoque ac scapulis in consensum pertractis; ut taceamus frequentes artuum dolores hypochondriacis evenientes, & nephriticos quoque hinc enatos, ac combinatos; cephalalgia ipsis frequentissima est, aliique supremi ventris dolores, ac catarrhi, vertigines quoque, aurium tinnitus &c. Gravissima quoque alia in malo graviore ac diuturniore accedunt mala, cacochymia, scorbutus, cachexia, icterus, colica, hydro-  
pis omnes species, tabes, marasmus, epileptici insultus, apoplectici denique ipsi haud rarò colophonem imponunt malo.



Mens in affectu *Hypochondriaco* plurima patitur, omnes animi affectus motusque sunt in iis magis inquieti, ob similem spirituum dispositionem, inde & ad munia sua obeunda sunt tardiores, minus prompti, ac ineptiores, (quanquam & eò lassitudo corporis justo major conjuncta conferat) Tristitia verò & frequentius & gravior eos affligit, transitque sæpius in *Melancholiam hypochondriacam*, malum molestum ac diuturnum, ejus uti plurimi sunt gradus, ita eorum tamen & varietas & major minorque intensio radices suas habent in suprà memorata sanguinis ac primarum viarum dispositione, quæ in animales quoque Spiritus transeundo istos phantasiæ vel errores, vel labores, ac passiones efficit; unde & facilitas ad lachrymas, earumque sæpe ubertas sequitur, in sexu maximè fœminino, in quo hysterica mala cum hypochondriacis arctissimè uniuntur, prout menses vel tardiores, parcioresve sunt, vel penitus sunt detenti ac obstructi, vel etiam cum nisu ac doloribus enormibus fluant, aut nimio fluxu spiritus debilitant, ac dissipant. Utrique verò sexui eadem ferè imminent symptomata etiam præcordialia, dyspnœæ, asthmata, tusses, cordis frequentes Palpitationes, imminentes lipothymia, etiam quandoque supervenientes, & capitis supra jam tacta, quibus & addere juvat narium hæmorrhagias, & quæ frequentissimè quoque in his subjectis eveniunt motiones hæmorrhoidales, vel inanes & in nisibus subsistentes, vel & apertis hæmorrhoidibus fluentibusque, aut etiam cœcis ac dolorificè tumentibus sine fluxu, aut tandem sequente illo, haud rarò immodicis excretionibus in calidiore sanguinis ac ad fusionem & orgasmum prona dispositione. Febribus faciliè tentantur epidemicè grassantibus, ac recidivis quoque facilius quàm alii expositi sunt. Habitus corporis hypochondriacorum est diversissimus, cum macilenti alii, ac tabidi ferè, alii carnosiore habitu, imò & obesiore paulò existant. Malum suas habet exacerbationes ac periodos, etsi minus statas; etsi & cum Lunæ phasibus, ac tempestatum variationibus solstitialibus, & æquinoctialibus connexionem aliquam habere visas.

Cæterum de sanguinea eorum massa, hujusque constitutione vix judicabis congruè ex sanguine è vena secta emisso, cum ille sæpe elegans, floridusque, imò nimis floridus compareat ob orgasmum, cum pejus habent, & fœdum referat spissior colorem, mitius urgente malo. Nihil verò eos lædit gravius, quàm vitia diætæ, cibi visceridi, dyspepti, crudi, crassi, falsi &c. Vina acida, nimis calida ac spirituosà, nimia quantitate hausta, cerevisia non fermentata vel ad acorem desciscens & incli-

nans;



nans ; animi gravia pathemata ; excernenda intempestivè retenta &c.

Juvant autem plurima pro causarum & graduum varietate , animi corporisque congrui motus. Acidulæ prudenter adhibitæ , neque enim omnibus æquè ac promiscuè sunt utiles. Purgantia lenia aliis præferenda, nec tamen omnibus indiscriminatim exhibenda. Emetica multa cum circumspectione, nec promiscuè danda, respiciendo ad toni ventriculi firmitatem residuam adhuc. Cæterum conveniunt stomachica, absorbentia, blanda adstringentia, Martialia mitiora, aperientia, nervina, roborantia, carminativa, aromatica leniora, enixa salia, nitrum, cinnabarina, tonica varia &c. Diæta cuivis dispositioni ac temperamento congrua instituta. Quæ autem reperta memorant authores in cadaveribus defunctorum post diuturnas affectus hujus chronici passiones, de tristibus potius ejus effectibus instruere nos poterunt, quam de genuinis mali causis ; quæ inter referuntur, flaccidus ventriculus, tumida intestina, induratum pancreas, scirrhum mesenterium cum suis glandulis, ac subinde hydatidibus quoque, lien (cui plurimi omne hic malum tribuunt) sæpius illæsus, quandoque etiam durus, corruptusque, uti & hepar ; vasa infarcta ; polypi &c.

*Hæmorrhoides* cum affectu Hypochondriaco connexionem habent peculiarem, sive cœcæ illæ sint, sive apertæ, uterque enim status cum infimi ventris viscerum ac vasorum habitudine vinculo arctissimo colligatus est, uterque ægrotis sæpe molestissimus, cœcarum quidem hæmorrhoidum doloribus sæpe redditis quasi intolerabilibus, apertarum verò immodico fluxu periculum ac graviora minante, æquè ac intempestiva earundem suppressione.

Uti verò hæc de hæmorrhoidibus doctrina magni est momenti, ita penitus in eam inquirere, ac certiora de ea tenere principia interest discendum. Sunt enim notanda hic non pauca. Et cœcas quidem hæmorrhoides adscribunt authores meliores venis hæmorrhoidalibus externis, quæ ramuli sunt cavæ venæ, apertas autem suumque effundentes laticem hæmorrhoides internis potius, venæ portæ ramos constituentibus ; quæ quidem utut frequentius ita sese habeant, haud dubitandum tamen fuerit, cœcas hæmorrhoides, quæ ab externis ramis provenientes tactui se visuique suo tumore ac dolore exterius manifestant, posse quoque accidere circa internarum hæmorrhoidum vasa, ibique formatis aggestionibus ac collectionibus analogis summas sæpe ægris creare molestias, eò tamen occultiores, suspensumque tenentes sæpe medici

animum,



animum, quò minus eò vel visu vel tactu attingere, doctaque solum conjectura penetrare in abdita ista naturæ laborantis molimina licet; pariter & fluxus hæmorrhoidum frequentissimè equidem ex internis hæmorrhoidalibus proveniet vasis, sine exclusione tamen externorum, quæ suum quoque effundere laticem vel ultrò, vel variis excitati apertique stimulis possunt.

Tumor scilicet vasorum & quidem adeò dolorificus contingit, cum aggestio sanguinis fit circa hæc vasa, sanguine ea promptitudine & copia non refluyente per venas, quâ appellit per arteriarum furculos, hinc sanguis ille, sive jam sit spissior aut tenacior, sive tenuis, orgasticus, biliosus, aut flatulentia quasi turgens huc congestus, nec, ut par est, progrediens, distendit ramos illos hæmorrhoidales, inæqualiter quidem tumentes propter valvulas, incurvationes vasorum ac situm eorum variorum inter alias partes; & ab ista potissimum intumescencia, nataque hinc fibrarum nervearum tensione emergit dolor ille cæcarum hæmorrhoidum sæpe intolerabilis, ita tamen ut nec rosionem atque irritationem acris illius sanguinis stagnantis excludamus, qui sic in inflammationem sæpe ruit, imò & suppurationem, si diutius constrictus sanguis viam, qua elaboratur, reducaturve haud inveniat; aliàs enim, disposito eo mechanismo microcosmico, perrumpit ramulos minores, turgescens sanguis (ita ut vix opus sit, reserationem vasculorum semper ab acrimonia feri aut bilis morsicantis, & domesticum abstergentis parietum mucum repetere) atque extillat parcius largiusve quâ data porta. Ad varium verò hunc sanguinis vel tardantis, ac dolorem inferentis, vel fluentis statum conferunt, uti partim jam attigimus, partim triplex quasi species orgasmi, quorum unus vascula blandius aperiens leniter inde ac justa extillat proportionem, alius ea perrumpens ultra modum largius profunditur, alius denique distendens vasa, urgens latera, convellens fibras, doloremque ac cruciatum inferens enormem, ita tamen, ut vasa maneant pertinaciter occlusa, neque iste tantum faciens in fibras tensas impetum sanguis ulla ratione exitum moliatur, etsi delinientibus variis, imò & stimulantibus frictionibus eum ad egressum invitantibus; partim contribuit ad istas motus sanguinei anomalias variantes, varia vasorum dispositio, fibrarum tensio, laxitas diversa, sensus fibrarum delicatus, nata hinc contorsio spasmodica irritationem augente distensione, dilatatione vasorum ac viciniæ, seu fibrarum iis connexarum, contiguarum & continuarum, unde sanguinis in



Systēmate vasorum Mésaraicorum ac hæmorrhoidalium congestiones, ataxiæ, ac tendentiæ diversæ, vasis quoque nimium distentis amittentibus fibrarum tonum ac elaterem, unde jam minus promoveri queat sanguis in vena tali dilatata accumulatus. Orgasmus verò ille non tam ferro bilioso acri, quam sanguineæ massæ integræ turgescenti & orgasticæ, vasorumque gravanti systēma adscribendus est; effluensque etiam sanguis de massæ reliquæ dispositione ac crasi testatur, unde & sæpe floridus prodit, etsi à mora stagnationis majori vel breviori pendeat coloris varietas.

In utroque igitur hæmorrhoidum genere fit aggestio sanguinis circa illa loca, ac collectio ejus, effluentis quidem ex apertis hæmorrhoidibus, sive jam adsit simul protuberantia vasorum turgidorum & intumescensum, sive absit illa, collecti autem, ac stagnantis pertinaciter in cœcis, ortis inde nodis vasorum quasi varicosis, tuberculis paucioribus, vel pluribus etiam, satis interdum magnis ac figuræ non unius, dolentibus quandoque, & diversissimo quidem doloris gradu tumoribus illis, alias verò & sine dolore observandis; alia mariscarum & condylomatum ratio est.

Tumentibus verò hæmorrhoidibus haud statim determinaveris, an *cœcæ* eæ sint futuræ, an aperiendæ ac fluxuræ, cum etiam iis intumescant, nunc diu, nunc brevius, nunc cum dolore, nunc sine dolore, quibus fluere solent: etsi non eadem semper succedant promptitudine ac facilitate; cœcæ verò intumescunt sine subsequente fluxu vel apertione vasorum, etsi anxie sæpe quæsita, optataque; occasionem præbentibus vel externis quibusdam pressionibus ac violentiis, uti equitatione diuturna in iis, qui ei assueti non sunt, vel interno etiam sanguinis orgasmo solo, aut consistentia ejus spissiore ad circulationem promptam minus apta vel propter gelatinescentiam, vel propter visciditatem ac tenacitatem; alvus quoque frequentius ac pertinacius adstricta, indeque expulsæ magnis conatibus feces duræ ac intractabiles excitationi tumorum istiusmodi dant ansam, & quandoque partus laboriosior puerperarum. Hinc varium quoque exhibent schema ac figuram, nunc referentes varicosam venam, ac nodosam, nunc simplex referunt tuberculum; unde & forsan quibusdam pro aniprocidencia aliquali poterunt haberi, ab aliis pro initio cujusdam abscessus hic colligendi, (possunt enim hîc abscessus oriri tum per se, tum ex cœcis hæmorrhoidibus) potissimum tamen comparente tumore molli, lividoque; si autem doleat, vehementer sanè dolet, auctis tormentis non à motu saltem quocunque, sed & ab ipsa sessione, unde novimus, qui diutissimè genubus innixi vitam inter dolores traxerint immanes, ægrotos; tum enim non nudum ac molle tuberculum est, plerumque junctum cum inflam-



inflammatione , quæ vel discuti iterum ac dissipari potest , discusso sanguine stagnante ac resorpto in vascula , viamque circulationis massæ reliquæ , aut inveniēte exitum , dum aperiuntur fluuntque hæmorrhoides , vel induratur tuberculum humore in illo inspissato ac congelascente quasi , vel etiam more plurimarum aliarum inflammationum , ubi sanguis plenius stagnans moramque trahens abit in putrescentiam atque in abscessum , eò cautius , curatiusque tractandum à Chirurgo , quò facilius neglectus istiusmodi abscessus , nec citò satis atque ab ipsis radicibus ac fundamento suo percuratus abire solet in *ani fistulam* satis dein daturam molestiarum , inducto lateribus ulceris callo , indeque nata effluxione puris perpetua ; ut taceamus exempla transeuntis in gangrænam sphacelumque huiusmodi inflammationis.

Præter verò insignem ipsarum hæmorrhoidum cæcarum dolorem , alia illas mala sequuntur partim & comitantur , ingens lassitudo , dorsi ac lumborum quoque dolor , febrilia symptomata , æstusque , ac horripilationes quoque aliquando , dyspnœam etiam inferunt , & anxietates , varias strictureas spasmodicas , imò ipsos in *ἀκμῇ* motus convulsivos , innumeras molestias aliàs hypochondriacas dictas , maciem , pallorem , cacochymiam , cachexiam , phthisin , huiusque præambulam hæmoptysin sanguine in pulmonibus inveniēte negatum in ano exitum . Prodesse censentur venæ sectiones in pede instituendæ ; aloëtica fluxum promoverè apta censentur , non tamen semper in cæcis tutò danda ; aliis aperitivis multum præferendis maximè in paroxysmo tam dolorifico , ubi temperantia , delinientia , paregorica , emollientia , ex verbasco , linaria , scrophularia variè adhibentur internè , externèque applicantur in fomentis , facculis , linimentis , unguentis ; quò & commendant tanquam sedativum factum ex theriaca linimentum cum cæpis ; internè addenda absorbentia , diluentia , temperantia , orgasmum sedantia , refrænantia , nitrosa , papaveracea &c. pingua quidam commendant , quidam arcent , variantibus tamen casibus variè pronunciandum , hæcque cum aliis combinanda pro re nata , maximè si appareat non amplius discutiendam esse inflammationem , sed abituram in abscessum . Quid verò dicendum de apertione ? illa sanè non facilè scalpello tentanda ob mala inde metuenda , passimque observata . Cæterum hirudines & præservativè sedi applicant alii & curativè ; quidam & lenes commendant frictiones .

Hæmorrhoidum aperiendarum eadem quæ initia quædam & occasiones est ratio , cum & præcedere plerumque soleant vasorum intumescen-



mescentiæ, cum vel sine dolore, imò & cum pruritu quodam, (etsi quandoque sine his præambulis succedere ac fluere soleant) dante occasionem vel causa externa, motu, frictione assidua, aut pressione inter equitandum, aut alios labores, à purgantium, maximè aloëticorum abusu, eò autem gravius à violentis scammoniatis, colocyntheticisque excitantur, etsi hæc cruenta excretio symptomatica sit, nec referri ferè mereatur ad periodicam hanc & suo modo criticam salutaremque saltem intentione, ut sic loquar, naturæ.

Neque omnibus promiscuè hominibus fluunt hæmorrhoides, ipsæ quoque nationes in hoc differunt, inter nos vix tam frequentes sunt ac in Italia, unde & nostri homines, nihil his in terris sentientes istas in regionibus illis motiones ac tendentias, imò & eruptiones faciliè experiuntur; nam & inter nos longè plures tendentias illas hæmorrhoidales & ad ista loca tendentes nisus sentiunt, quàm quidem revera fluxum illum patiuntur aut consequuntur. Sexus verò uterque istis ad hunc locum aggestionibus subjacet, cum & fœminis contingant, non solum obstructis mensibus fluentes & aperiendæ, sed & sine isto defectu, sua sponte in intervallo illo, imò & tempore eodem ferè, & post illos, sed hæc omnia haud adeò inter nos frequenter sæpius saltem tendentias illas, & cœcarum hæmorrhoidum nisus experiuntur mulieres.

Patiuntur autem hæmorrhoidalia ista potissimum & præ aliis hypochondriaci, & scorbutici quoque, paucis ii omnes qui orgastico gaudent sanguine, aut simul viscidulo, acri, turgente, in numerosissimis abdominis vasculis tardius moto ac impediendo faciliè, quò biliosa dicta dispositio confert, imò & illa quam vocant atrabilariam, unde mirum non est, si frequentius obtingant in calidiore regione, vinique calidioris usu; status verò ille orgasticus aliis dicitur plethora, plethora autem non pura, sed vel biliosa, vel serosa, vel cacochymica, quæ orgasmum potius dicit quàm veram plethoram, & juncta cum visciditate humorum innumeris vasculorum obstructionibus, viscerumque oppilationibus ansam subministrat ac materiam uberrimam.

Non verò eadem hæmorrhoidum etiam succedentium ratio est, cum pauciores sint ii, quibus fluxus ille ita sit ordinarius, ut certis definitisque redeat periodis, & quidem mensstruis; plerique enim incertam in se deprehendunt excretionem, vix annuo quandoque spatio recurrentem, vel alio quocunque vago tempore, & prorsus inæqualibus interval-  
ternæ,



ternæ, vel internæ etiam causæ ac tendentiæ dederint occasionem frequentiore, aut rariore; ita ut in plurimis sola sæpe tendentia, gravatio, ac pruritus subinde in his partibus sine ullo unquam, aut cum paucissimis etiam ejus guttulis, sanguinis profluvio.

Est & quandoque aliquid ea in re hæreditarii, tractaque à parentibus dispositio, allegatis supra occasionibus externis, internisque eam excitantibus ætate paulò regulariter adultione; ubi autem semel tendentia ad has partes invaluerit, aliquid quoque consuetudinis enascitur, perpetuòque dehinc consuetam viam tendentiamque sub orgasmo quovis affectat aut stimulo, uti circa omnes observamus excretiones, naturam tritas jam aliquoties vias ac motiones haud facilè deferere, sed ad locum semel apertum facilè novo se conatu determinare; cumque in ἀκμῇ ætatis, & abundantia illi competente succorum eveniant, patet appropinquante senio ac orgasmo proin & plethorico habitu cessante eas desinere, nisi caloris abundantia, æstusque sanguinis suppleat ætatem, aut ejus nimia vel acrimonia, vel cachecticus quispiam fluor ultra consuetos terminos talem cieat excretionem non amplius vel congruam, vel tempestivam; etsi verò fluxus succedens avertere alia mala, corporique proficuum esse soleat, sive floridior ille prodeat, sive serosior, imò & nigredine quasi conspicuus, attenti tamen ad rem suam esse debent istiusmodi hypochondriaci his fluxibus obnoxii, ac invigilare ne turbent hoc naturæ molientis negotium reprimantve intempestivè, æquè enim hoc ipsis foret noxium, ac mensium cohibitio fœminis esse solet, imò ferè magis, cum fluxus iste jam orgasmos præsupponat in sanguinea massa, & acrimoniam plerumque visciditatemque habeat comitem, facilèque, nisi circumspectè se gerant transire possit ipsorum status in Cacochymiam, imò cachexiam graviolem, aliaque mala; quemadmodum & diuturna mali habitudine, crebroque irritatis his partibus variæ enascuntur molestiæ, subinde & ipsa ani procidentia sub tenesmode urgentia & egestione sub nisibus hæmorrhoidalibus, imò & partium illarum inflammatio gravis, facilè transiens in gangrænam nisi maturo obviam eas consilio, vel natura adhuc vigore aliquo suo par sit resistendo, sæpe enim à crebrioribus illis, & largioribus fluxibus debilis fit æger, consumentis viribus, carnibusque.

Fluxus verò magis contingit tempore verno, atque autumnali, etsi & indistinctè evenire queat; fluunt autem ex vasis vel internis, vel externis, ex his etiam quandoque conspicuo modo, guttatim, imò rivu-



Io pleniore, aliquando & internæ & externæ simul aperiuntur; utrarumque cruor prodit vel ante, vel post alvi dejectionem, fecibus quasi tinctis sanguine, aut hoc illis adhærente, vel guttularum forma comitante aut sequente, variè à scybalis impedito, aut etiam magis quàm par est irritato, & promotò; flatibus quoque rem subinde turbantibus, quibus potius adscribendus videtur sibilus, quem adscribere nonnulli videntur hæmorrhoidum sub hoc statu effluxui. Quanquam & purus sanguis subinde sine fecibus excernatur, stimuletque alvum ad sui depositionem. Quantitas enim sanguinis, quæ hac via egeritur, valde est inæqualis, pro orgasmi intensione, abundantia sanguinis sub aggestione hac, hujusque majori nisu, ac humorum acrimonia, fluxilitate, ac ipsorum quoque osculorum apertorum moderamine, patentia, ac laxitate; proque ipsa diætæ varietate, omnia enim calidiora, sanguinem in tumescentiam adigentia, augent fluxum.

Imminentis fluxus indicium ajunt esse dolorem & ardorem dorsi, imò & ipsius abdominis, sed incerta & hæc sunt utrique hæmorrhoidum nisui, & efficaci, & inani communia; Melancholicos autem, aliosque hypochondriacos egregiè sæpe juvat ac solatur ille fluxus, avertendo morbos, vel imminentes, vel jam præsentés; Præprimis melancholicorum symptomatum inferens mitigationem, uti & maniacos inde sedatiores factos testantur observationes &c. Uti verò jam monitum est, circumspècto diætæ regimine, usuque moderato rerum non naturalium indigent, quicunque hoc tenentur fluxu, vel eum optant, aut præstolantur, sentientes tendentiam ad has partes sanguinis turgescens; inter remedia verò variis scopis martialia commendantur, anticachectica, tonica, absorbentia, roborantia, orgasmum intempestivum ac nimium temperantia, paucis, sanguinis consistentiam, mixturamque laudabilem conservantia, cum uti jam diximus soleant hi fluxus sensim post se trahere pravam humorum dispositionem, etsi suo modò utiles, & si maneant intra terminos remediis haud indigentes.

*Hepatis morbi* sunt conjuncti cum summo periculo ob visceris hujus nobilitatem, arctumque cum vita nexum, dolendumque est ea visceris tam insignis mala cum manifesta fiunt, eamque in lucem prodeant, ut de illorum præsentia haud amplius dubitandum sit, plerumque esse in statu pessimo, vixque ullam Medici admittente opem, tum verò, cum in principio suo sunt, ac sua quasi parant rudimenta, ac radices figunt, quam maximè lateant, occultaque sint adeò, ut quandoque de iis ne per som-



nium quidem vel æger cogitet , vel Medicus , cum in iis initiis non tam in hepatis regione turbas sensibiles , molestiasquè exhibeant , sed plerumque alibi per consensum nervorum , humorumquè , suam ludant tragœdiam , habent enim suos gradus quamplurimos , ac variationes insignes. Nec rarò accusatur hepar , ob exserentia sese in illius regione ac vicinia incommoda , quæ tamen ad ipsum illud viscus minimè spectant , sed vel reni , vel intestino , aut diaphragmati , mesenterio , imò abdominis musculis , aliisve partibus accidunt. Unde etiam signa hepatis in tono suo labefactati ac debilitati , adeoque malè satis habentis , desumere cogimur à signis satis incertis ac fallacibus , uti notorium est , quod petantur talia à colore cutis , ac facie potissimum , ab excretorum diversa dispositione , corporisque habitu , incremento , ac decremento , qui omnes signorum fontes communes sunt tot aliis affectibus , ut nihil certi statuere circa hepar ex illis liceat. Si enim acutè laboret hepar , fieri aliter non potest , quam ut in totam mox sanguinis massam , corpusquè universum lustræ diffundantur , febrequè continua ex ardesciente jam non integrum est discernere domesticum hepatis malum , latens sub tantorum symptomatum impetu , vel saltim aliis æquè adscribendum partibus : ac circa illas aggestionibus sanguinis. Si verò chronicum sit malum , illud tam occultè , lentèque , per cuniculos quasi serpit , ut vel penitus lateat ad ἀκμὴν usque mali incurabilis , vel saltem dubiam sui existentiam obscura quadam subinnuat lucula , vel umbra potius , & tardè quidem , cum tollere radices mali jam altius progressas , diffusasquè , non amplius liceat ; vel si etiam cognoscerentur talia mala , ita tamen comparata sint , ut vim artis plerumque eludant , spernentquè omnem , paucis quibusdam molestiis exceptis , quæ ad hepar ferè solum non pertinent.

Nonnunquam enim in ipso hepate initium mali est , ac primariā origo , nonnunquam autem aliunde ipsi demum imprimitur ac communicatur præcedentibus aliis queis tum demum hæc accedunt , morbis , tum febrilibus tum aliis. Semper tamen humorum vitia suberunt , sanguis ea copia perluit hoc viscus , ut non possit non omnem suam labem , crasque illi communicare , lymphæ ea quoque abundantia in hepate discernitur , ut de illa æquè ac de sanguine possit dici , eorum dispositionem plurimum ab hepate pendere , malè ab illo pravè affecto affici , illudque vicissim graviter sæpiusque afficere ; quod & de bile , secreto in hepate succo certum est , bilis enim & noxam ab hepate suam trahit , & mala sua propria hepati imprimit vicissim profundissimè. Omnes ergò hi humores



mores agunt variè in hepar , varièque ab eo patiuntur malè affecto.

Ex eo autem vix multum pro sanatione morborum hepaticorum didiceris , quod sectione cadaverum tam varia ejus detegantur vitia , ipso ejus parenchymate nunc indurato , nunc pallecente , ac livido , nunc corrupto , imò putredinoso , hydatidum agmine , lymphaticorum vasorum sobole , conspersum , tuberculis callosis , tophaceis , crudis , ac suppuratis , abscessiformibus repletum , in molem immensam auctum , calculis quoque , imò vermibus obsitum ; hæc enim omnia vivente ægro manent occulta , post mortem detecta nihil prodesse queunt , si prius autem vivoque ægro conjectura Medica erudita sui suspicionem inducant probabilibus detecta signis , ac symptomatibus , vix talia sunt quæ ullam admittunt opem salutarem aut sanationem radicalem ac constantem ; pleraque etiam sub finem demum chronicorum istorum morborum ita formata , istumque , in statum mora ipsius mali detrusa sunt , funesti effectus latentis diù mali. De obstructione Hepatis multus apud ægros , Medicosque sermo est , nec dubitandum est viscus hoc nunc in paucioribus , nunc in pluribus parenchymatis sui partibus obstrui posse ac solere , scilicet posse & glandulosos ejus acinos ac vasculorum teneræ complicationes , & lymphatica queis obtegitur frequentissima vasa , & biliariorum ductuum ramuli , vel sanguiveha etiam vascula utriusque generis obstrui , sive ob viscidiorum sanguinem , ac impura mucilagine imbutum , sive ob pituitosum lymphæ spissescientis mucum , aut tenacis gluten acre bilis , aut ob tartareas , quæ in tenuissimis à sanguine dimissæ vasculis tophacea viscus infarciunt concretione , moleculas , quæ omnia in vasculorum interstitiis eò promptius hærent , atque concresecunt , quò elater fibrarum debilior , remissiorque fuerit , & ad promovendos in circulo suo secretorio succos robore ac vigore præditus fuerit minore. Quanquam in conjecturis plerumque mali hujus agnitio subsistat , accusatis obstructionibus plerumque , haud inveniendis in viscere , iis verò haud agnitis , quæ omnem ejus ambitum reverà multiplici viarum obstaculo occupant.

Eadem incertitudo doloris est , non quà sensum ipsum , sed quà locum , subiectumque doloris ; sit enim in latere dextro dolor gravativus in hypochondrio dextro , imò & conjunctus ille cum intumescencia quadam atque inflatione , erit juxta Semioticæ regulas suspicio de dolore hepatis , qui forsàn colo rectius , aut alii parti vel membranæ vicinæ adscriberetur , coli enim tumorem faciliùs ligatura constringes , reprimisque dolorem inde natum , quàm hepatis dolorem ; multo magis



si vagus sit dolor, dextrum modò, mox sinistrum occupans latus, quem eò minus adscribes hepati, quò evidentius ad alias se extendit partes ac regiones; neque ista tamen dicuntur, ac si dolores non posset pati hepar, de hoc enim dubium est nullum, sed quoniam difficile est dolente illo hypochondrio præcisè determinare, an hepar doleat, cum tot aliæ partes sensiles eadem regione concludantur, quarumque dolor effectus post se trahit ratione periculi diversissimos. Obtusus sanè dolor à mole grandescens, obstructivè visceris, ab humorum incompleta stagnatione seu tardiore per illud motu, nervorumque pressorum torpore, obstructisque inæqualiter ductibus, & humorum simul juncta turgescencia aliquali potest omninò oriri, sed potest is quoque esse à colo, per consensum à rene, aut alia parte vicina. Dolor acutus atque inflammatoriæ originis, rarior equidem, accidere omninò hepati potest, sed & hic incertitudo perpetua est, ob diaphragmatis maximè viciniam. Alvus obstructa, vel aliis laxior atque prona ad diarrhœas eo incertiori indicio allegabitur in doloribus hepaticæ regionis, quod cum hepate illa nexum haud habeant necessarium, saltem cum intestino majorem. Vomitus anxietate urgentes ingenti, ac nigricantes, non tam certitudinem affecti hepatis, quam periculi imminentis, quocunque etiam existente mali subiecto indicant.

Agnoscent enim Authores in exquisita etiam *hepatis inflammatione*, quæ vel in *hepatitide* universum occupat hepar, vel partem ejus in *vomica*, aut *abscessu* quodam cum majori evenit, exardescitque dolore, ac continua, acutaque febris, agnoscunt, inquam, semioticæ Scriptores symptomata in hoc inflammatorio statu hepatis esse pleuritidis æmula, ac pro pleuritide facillè haberi (adeò incerta est specialior ac præcisa diagnosi) cum tussis urgeat, punctorius, acutusque adsit dolor, ac difficultas insignis respirationis, ardore se latius in latere extendente; neque verò semper jungitur tumor; sitis autem maximè urget, ac vomitus quoque; urina flammea ac tincta valdè emittitur; Si quid verò adhuc valeant remedia in malo latente ac gravissimo, id consolationis tamen suppetit ægro, medicoque, etiam ea, quæ prudenter opponet exquisitæ pleuritidi, quam mentitur tum occultior affectus, neque huc fore inepta aut inefficacia; venæ sectio scilicet in principio morbi adhibita, bezoardica, blanda pectoralia, demulcentia, aperientia, diaphoretica fixiora, nitrosa, roborantia &c. Si verò de malo sis certus per signa, Chirurgica tamen Abscessuum, ac vomicarum ad externa protuberan-



berantium apertio , istaque methodo sanatio successus est rarioris , nec omnibus fors *D. le Blanc* , *Ministri Gallici* , obtingit , plerumque enim ita prius invaluit Cachexia , aut necrosis in statu acuto tam subitam inducit putredinem , ut aperto etiam abscessu omnia in pejus ruant , ac mors præsentanea instet. Cæterum abufui Spiritus vini mala hepatis singula transcribuntur frequentius , ista enim calida inebriamina adeo accendunt sanguinem , aduruntque , obstruunt & siccant viscera , ut infauſta talia sequantur abufum illum symptomata ; de violentiis externis nihil addemus , quæ omnino contundendo quoque graviter lædere hepar ac irritare queunt.

Celebris quoque est *Hepatis scirrhus* , atque induratio parenchymatis ejus , qui potius diuturnas , chronicasque visceris obstructions infarctusque sequitur , quàm hepatitidem atque inflammationem ( etsi & hæc mortem non semper inferat , adeoque ad minimum possit abire in indurationem ) adscribitur à quibusdam lymphaticorum vasculorum crispaturæ sæpe juncta hydatidum genesis , ad minimum istæ vesiculæ vasorum illorum dilatationes haud malè referunt , tuberculorum verò durities glandularum subsidentia , malleme dicere , vel oppilationi , vel compressioni ; quæ universalior facta visceris augere molem ac vastissimas illi addere poterit scirrholas dimensiones gelatinoso viscidoque sero sensim siccato intra tubulos , quos distenderat , concretoque , conjunctis terreis multis ac tophaceis particulis inertis bili innexis arctius , & sic in scirrholam indurari consistentiam ; facile quoque ob identitatem succi vicinas quoque glandulas alluentis , illæ quoque in mesenterio augentur atque indurescunt. Quod & in liene frequentius observatur. Pro statu diverso , graduque mali conveniunt aperientia , resolventia , diaphoretica , depurantia sanguinem , roborantia tonum , carminativa , discutientia , vulneraria , ac demulcentia , martialia , anticachectica ; respiciendo semper ad statum sanguinis magis vel minus caco-chymicum , humiditate vel prævalente , vel deficiente ; calore vel eminentiore , vel depresso , &c. Acidulæ sæpè admodum proficue , non semper tutæ ; maximè si læsio hepatis , vomicaque lateat &c. nec quicquam valent in tollenda induratione.

*Herniam* ad caput hoc referimus , utpote ad abdomen omni jure spectantem affectum ; est verò illud vocabulum æquivocum , nunc pro vera hernia , nunc verò pro tumore alio improprie sumtum , qui eadem loca occupat ; , unde bronchocele , colli hernia in scrophulis fundata



fundata ad hanc classem nullo planè jure aut respectu referri potest ; vera autem hernia in scroto potissimum detenta est , ita tamen , ut & iste locus admittat amplitudinem , cum enterocele , & enteroepiplocele à contento tumoris dicta vera hernia , ratione loci specialioris sit omphalocele , bubonocèle , oscheocèle seu hernia umbilicalis , inguinalis , ac scroti ; impropriè verò dictæ herniæ vocari solent hydrocele , pnevmatocele , sarcocèle , cirsocele , sive hernia aquosa , flatulenta , carnosa , varicosa ; & hi scroti tumores propriè non sunt herniæ.

*Aquosa* autem dicta *hernia* non saltem in hydrope occurrit ( uti passim practici loquuntur libri ) in quo scrotum sæpe distenditur in molem stupendam , & ad crepaturam quasi usque , sed & per se sine hydrope , ubi etiam facilius utiliusque admittit paracentesin quam in hydrope , in quo administrata paracentesis scroti rarò ægrum à morte liberat , quandoque & eam promovet acceleratque , etsi etiam in hernia aquosa sine hydrope obvia paracentesis non nisi palliativam imperfectamque promittat sanationem , cum teste experientia multiplici pluribus etiam vicibus iterum impleatur sero scrotum , nova paracentesi educendo , unde alii præferunt sectionem , & ipsius loci , unde extillatio feri fit , cum vicinis partibus arctam coalitionem sub recentis illius sectionis prudenti sanatione post suppurationem decentem , fonte sic ab ipsis obstructo fundamentis , cujus quædam observavimus exempla à Chirurgo hac ratione plenè ac constanter liberatorum. Semel enim apertis viis ruptisque lymphaticis vasculis , lympa facilè iterum ad easdem depluit cavitates , quo diuturna consuetudine confluit , ac ubi oscula sibi paravit quasi temporis mora callosa reddita , semperque novam stillantia lympham , nisi penitus ista ablata callositate ex fundamentis coalescant , accrescantque , recenti cicatrice vicinis membranis. *Carnosa quoque hernia* aquosæ haud rarò conjungitur , imò & varicosa , ab illa haud adeò distinguenda sollicitè , etsi in una epididymides magis ac spermatica vasa , in altera testiculus ipse afficiatur , mole eorum vel crescente , vel nova ipsis excrementia adhærente atque adnata augmento variæ , & nonnunquam stupendæ magnitudinis ; facile autem fieri potest in partibus adeò teneris , sensilibus , mollibusque , ut stases fiant humorum , rupturæ lymphaticorum , ex quibus extillans serum & stupendam in molem diversis gradibus colligi potest , distento incredibiliter scroto , & contrahere acrimoniam stagnando , fibrasque arrodere , aut humectatione diuturna contribuere ad excrementia fibrarum , carnesque dehinc & luxuriantes , pro vario fibrarum nunc laxiorum , nunc



tensiorum statu , majori semper facto affluxu , ac stasi humorum , partes magis magisque augmentum ac distendentium ; etsi non semper conjungantur aquosa hernia & carnosae , neque enim aquosam vocaveris qualemcunque , quæ & in carnosis purè talibus adesse queat , humiditatem ; carnosae verò pariter diversos magnitudinis , sed & duritiei gradus admittit , adeò ut & quandoque scirrhosam acquirat eam. Flatulenta quam vocant hernia , quamque infantibus sæpe evenire scribunt , ipso temporis tractu iterum absumendam , sola hac scroti infantilis flatulenta tensione ac repletione non absolvitur , sed adultis quoque solet evenire , quod à frigore potissimum observatum est , carminativis eam feliciter discutientibus , quæ internè externèque sedulò adhibita incarceratos istos halitus flatusque potenter dissipant. Vera autem & propriè dicta hernia dicit tumorem ex abdomine ortum ac prodeuntem , enatumque vel in alterutro inguine , vel descendente ad scrotum illudque vel in utroque latere , vel in alterutro saltem occupante , dum scilicet intestini portio , relaxatis processibus peritonæi protruditur , vel sola , vel cum omenti portione.

Fit sæpe talis processuum dilatatio , intestinique prolapsus subito & uno quasi impetu , sensibili etiam punctura ac quasi scissione quandoque percepta , vel pedetentim , motu progressuque tardiori incrementa successivè capiens , ab exiguis sæpe initiis , vix avellanæ magnitudinem excedentibus , auctis dein ad columbini , quin & gallinacei ovi , imò & longè majorem molem , quæ quandoque in malo diuturno ac immodico vel capitis excedat magnitudinem , imò plurimum excedat , retracto genitali membro , ut vix conspici id queat , quod tum in hydrope , tum in hydrocele æque fit. Eadem verò & producant hoc malum & augment , clamores , tusses , vomitus , ponderum elevationes , motus corporis enormes , externæ injuriæ , lapsus , equitatio incongrua &c. Frequens quoque infantum malum , sed facilius tollendum ligatura apta ; quò & conferre credunt mulierculæ transplantationes varias ; Neque viri ac adulti ullius ætatis excipiuntur , frequentiori tamen existente inguinali ac scroti hernia , præ umbilicali ; quæ æquè ac alia in aliis abdominis locis sexui utrique evenire etiam potest , cum primis mulieribus à difficili partu. &c. Mollis est tumor herniosus , scilicet in certo suo statu , ubi inclusum intestinum non nimis infarctum , incarceratum , vel intusum est in angustias , ceditque pressioni introrsum factæ prudenti ac commodæ , siquidem cedere possit , nec stricta nimis sint vel impedita loca , per quæ debent regredi , maxime in supino ægri situ , pedibus magis elevatis locato ,



cato, ubi sæpe sponte retrocedit, vel intro adigi manu facile potest, sæpe cum murmuribus ac fluctuationibus, quæ & percipiuntur in novo passim egressu & prolapsu, facile enim erecto, commotoque fortius corpore iterum elabatur, non metuendo solum inde incommodo, sed potissimum periculo summo, neque sit securus æger, si talis hernia non statim elabatur, nec semper compareat, solet enim pro diverso relaxationis in processu statu ac gradu intestinorumque dispositione varia ac inflatione, non æquali ratione id contingere; nunquam tamen fidat æger illis facilibus egressibus, ingressibusque, est enim imminetque hora incerta, qua prolapsum arte nulla, fomento nullo, vel enchiresi Chirurgica reponere valeas, uti forsan prius sæpe factum est; hinc præstat perpetuò ligatura commoda esse munitum, nec eam facile deponere, ac talis præcipuè requiritur machina, quæ inter quosvis femoris motus situsque applicet processui lamina elastica mediante commodum obstaculum, ut nunquam libera sit via. Interim inter decumbendum minus erit prolapsus timendus, à pastu autem, assumtis maximè cibis flatulentis, fermentescente cerevisia, adstricta alvo, turgentibus urgentibusque flatulentis, & à frigore metuendum cavendumque est magis. Si reponi amplius non possint, præ foribus mors est, inflammatione mox accedente ac frigore extremorum, convulsivisque tandem motibus: Emollientia primum in reponendo egregia sunt; internè carminativa, resolventia, discutientia, traumatica, consolidantia, adstringentia commendantur, unà cum decubitu quieto, quæ tamen omnia sine emplastro tenaci commodaque deligatione ulteriorem impediende, præprimis mediante Elatere, prolapsum parum efficient; à compressionibus violentis cavendum: ad sectiones non facile accedendum.

---

**Nobilissimo Dn. Licentiatō**

*S. P. D.*

**PRÆSES.**

**R**edit labor actus in orbem! nec finit TE esse  
 immemorem Veteris Instituti Divinæ nutus  
 providentiæ. Primis statim Adolescentiæ annis  
 C 3 phar-



pharmaceuticæ arti navasti operam diligentissimam, abreptus verò amplioribus saluberrimæ artis deliciis Medicum Studium duobus jam abhinc lustris aggressus es, ejusque studium per vastissima artis profundæ spatia tum in Argentoratensi Lyceo, tum & in Alma hac Studiorum Matre alacriter decurristi; Ansam dehinc in Austria, Hungariaque, nactus exoptatissimam provehendi Studia Tua, eorumque pleniorē attingendi maturitatem: donec felicibus auspiciis redux in Patriam, ad Pharmaciam simul redis penetralia, Tuâque Officinam in Inclyta Efslingensium Republica Pharmaceuticam cura atque attentione dignaris. Omni scil. Artis saluberrimæ apparatu instructus etiam hanc ejus partem Tuæ potissimum sedulitatis elegisti exercitium. Cedant isti conatus feliciter! Nosti enim molem rerum hîc maxima obviarum varietate. Laboramus, non inopia quadam ac defectu remediorum, sed copiâ, selectum reddente perdifficilem. Et Galenica & Chymica, quæ in amplissimam hodiè artem coaluere, pharmaca excrevere in immensum. Lynceus hîc sit oportet, quisquis in ista farragine recto incedens tramite feligit tutiora, certioraque. Latet hîc quoque vanæ plurimum persuasionis, suspenditur hedera haud rarò quisquiliis, & consuetudinum, opinionumque, Tyrannis



rannis etiam in thecis pharmacorum, uti in vanitate vestium, atque in omnibus mortalium rebus violenter regnat. Sed bene est! Regnum hoc raro diuturnum est! Quod citò fit, citò perit. Aliàs fane obrueremur elogiis fictis superbientium vana commendatione pharmacorum. Gensing Sinen-  
 sium, eorum Putsiuk, Mongos Radix, Moringa Malabarica, natumque ex Tethiis, Holothuriisque Belilli, celeberrima primùm, jam quasi evanescunt, antequam ferè sint exorta. Eadem Liquetaiæ, Pareirabravæ, Kermes mineralis, aliorumque plurium fors fuit. Wakakam, Baniliæ Elæosaccharum, corticem Mecasuchil f. Baniliæ æmulum, Extractumque Thee Boy luxui Hispanorum relinquimus. Quid Indica Gentiana in Febribus, Catacambræ Trochisci valeant in Hæmoptysi, in Ictero Saia Radix, virtute Anodyna Cortex Jubaba, Oleum Hupo anthelmin-  
 tica, tempus docebit, fidaque experientia; cui & re-  
 linquimus præstantiam Cipo di Cameras seu sangui-  
 neæ Hypecacoanhæ, novum antidyfentericum nuces Ind. amaras, Vires olei Cajaputi in expellen-  
 dis secundinis lochiisque, Balsami Rakasira præ Copayvæ Balsamo in Gonorrhœa virtutem, atque albi Peruvianorum Balsami summa elogia; maximè Terræ Tanzuc Sinensis Bezoardicæ stupendam vim, quæ suspecta meritò est, cum monito Ill.  
 Kœle-



Kœleferi de Kerefeer Cel. D. Schendo van der Beck  
Mercurium in hac Massa auro junctum, atque  
Euphorbium & gummi guttæ detexit. Absit ve-  
rò ut ista in opprobrium dicamus exoticorum,  
quibus tantum debet Ars salutaris, commenda-  
re saltem discentibus circumspeditionem animus  
est, ne promiscuè credant magnificis, queis ornari  
nova solent, elogiis. Norunt quippe Exemplo  
Herbariorum quam faciles sint Scriptores in  
exaltandis viribus simplicium; nec deerit qui vel  
ex Urtica Panaceam faciat; eadem exoticorum,  
cùm primùm Europæ inferuntur, fors hætenus fuit,  
quorùm pleraque istas, queis cumulantur, laudes  
haud diu sustinent integras. Solus ferè Peruvianus  
Cortex satis necdum est vel laudatus, vel com-  
mendatus, sequiturque eum passibus non æquis af-  
finis Cascarillæ Cortex, utrique abusus Vulgi, &  
quorundam zelus (at ille non κατ' ἐπίγνωσιν) inurere  
labem tentavit, ea tamen non obstante prudenti u-  
su, methodoque effert Cortex inter alia exotica  
mira quadam dignitate Caput,

*Quantum lenta solent inter Viburna Cupressi.*

Sed retraho ex spissa hac Exoticorum Sylvâ pe-  
dem, calamumque! ac Tibi, Nobilissime Dn. Li-  
centiate ex animo gratulor, apprecorque felicem  
destinationum Tuarum prosperrimumque ul-  
tra vota successum. Vale!